

嘉興府志

地 240.83  
139.1

部 2:27

地  
233.25  
139





嘉興府志卷五十四

嘉興府知府善化許瑤光重輯



列傳

嘉善縣

明

孫詢字廷言博學多才宣德初應賢良詔為廣西布政司  
檢校時峒蠻竊發無甯歲安遠侯柳溥擬詢往諭之詢  
毅然冒險入宣上威德事以定陞分宜縣丞歲祿平量  
衡去冗費設法賑濟全活甚眾尋以疾致仕所著有忠  
孝廉節武塘覽勝諸書孫璧字拱樞官景州訓導亦善

嘉興府志

卷五十四

嘉善列傳

一

詩文

嘉善倪志  
參于志

俞綱字宗正寓籍上元為諸生改隸順天舉修宣廟實錄  
歷中書郎王受封簡輔導詔綱侍講歷陞太子少保兼  
兵部侍郎改南京禮部成化二年致仕十四年卒賜祭  
葬綱和厚縝密謹身率職稱為長厚君子王世貞言綱  
入內閣不由翰林且係乙科亦本朝異數然考綱當日  
被命即辭實未嘗入閣也嘉禾徵  
獻錄  
施奇字廷偉少好學寒暑不輟登景泰甲戌進士授工部  
主事奉使山後諸鎮閱視兵砦邊將餽遺悉卻之尋復  
清匠江西至建德鄉人有官縣幕者以白金餽奇駭曰



是安得此若執汝是賣廉矣亟去鄉人慙而退擢知太平府改知萊州卒

分省人物考

劉侃字克剛景泰初領鄉薦選知涇州政尚寬簡朔方歲事征討涇當要衝大將提兵必道涇侃措置有方雖供億百出民不擾都御史馬文升嘉其績與御史劉廷高交章論薦擢守延平同知某恃才凌轢侃置弗較未幾沒撫恤其家時稱長者侃素廉約兩赴官皆鬻產以行及歸囊篋蕭然授徒自給足不入城市號樂閑翁工楷書詩文亦清麗卒年七十

楊霖字時望祖嗣宗洪武中以人才徵試工部主事霖自

嘉興府志

卷五十四

二

少以氣節自負聞四明楊守陳遂易學負笈從之遊天順中貢領應天鄉薦知玉田改任寶坻抑強扶弱清白自守有古循吏風

以上嘉禾徵獻錄

夏勛字汝建知內邱縣歲飢蠲民租仍出粟賑之全活甚衆勛爲人疎簡持大體不屑屑細故逮居官持法不撓除奸去盜境內肅然

高第字士元以貢授永福知縣先是縣被兵荒民多流亡第至廣招撫給田開墾民復故業

周紀字廷理以進士授豐城令縣多淫祀有曰官將軍者尤惑人紀下車立毀之人服其正

以上袁志參嘉善倪志于志



任泰字亨伯成化乙未進士授上饒令時婁諒稱名儒屈體事之爲政知大體增置學舍親爲講授立法清丈田畝以杜爭訟作浮梁增社倉凡有利于民者行之不遺餘力孫夔字公職爲新野王府教授王年少夔以輔導自任進講輒以前代賢王事條析陳之夔事母孝父遺產悉讓諸弟弟芹爲蕪湖訓導醅厚簡默不苟言笑里人稱任氏世德云

嘉禾徵獻錄

王琳字廷佩登進士爲兵科給事中彈劾不避權豪尋陞福建右參議招撫永安頑民八百戶清廢稅千餘石轉

貴州參政卒

嘉善倪志

嘉興府志

卷五十四

嘉善列傳

三

王相字廷輔以貢拜蘄水丞邑田無經界多爲巨室兼并相至首正之濬畝澮以興水利御史上其事特加旌異尋移疾歸

嘉善于志

於珥字文瑞以進士知南皮縣遷吳橋丁外艱服闋改知無極皆有能聲擢建甯府同知革清軍紙價黜貪令衛有屯田久侵于民軍多逃亡凡五奏不得白珥按籍悉還之軍乃歸伍正德初擢知慶遠府土酋缺貢賦例出金啗守珥以其物充逋夷大感悅郡人不知學立程式

以課文教大興

嘉禾徵獻錄

卞謙字信之父翮家貧客同里有女窺之辭去爲諸生不



仕諶宏治壬戌進士授廣信府推官決獄精允雖老吏不逮嘗經鉛山嶺道有臥屍忽夜夢一人曰我傭者爲主所殺密訪其人得之竟抵罪郡有巨室殺人匿屍燕室中諶廉其處發屍驗之遂伏辜其發奸摘伏類如此嘗謂姑息所以養盜乃嚴鉤捕得宿盜重治之盜乃止三載行取道卒兄子玉有至性母病籲天願代爲廣東海陽教諭子錫負異才篤學登嘉靖丙辰進士官司勳時嚴嵩柄政不爲屈又嘗卻饒賈賂時論重之

嘉禾徵獻錄參

嘉善楊志

王俸字廉父嘉靖壬戌進士授職方從尙書劉燾征曾一

嘉興府志

卷五十四

嘉善列傳

四

本燾欲誅老帥王詔俸力爲解釋後竟用詔擒酋首以獻歷武選郎以議馬市忤高拱張居正而拱又秉銓遂出爲永州守庭無滯獄乞終養歸服除拱居正先後敗起廬州知府累陞湖廣道御史以疾乞休居家好施予宗黨賴之

沈科字子進嘉靖甲辰進士授工部營繕司主事庚戌邊烽直澗都下軍務久弛粹不能辦車牛科旦夕支給數日而畢飛輓旁午賴以濟知臨江府遷江贛兵備副使平劇賊李文標等時官江右者皆嚴嵩私人聞科才陰令人諷之科正色曰科卽不才柰何以天子臣爲相公



奴隸嵩銜之未幾轉苑馬寺卿左遷河南副使有欲爲科謀解於嵩者科聞而謝之卒不聽甫之官嵩喉言官劾罷之科事親孝撫其弟友愛生平磊落多大節嗜學能文著有史抄二十卷

以上嘉禾徵獻錄

盛唐字元陶嘉靖戊戌進士初授江西吉安府推官每讞獄摘發幽隱爰書成己手吏胥不能爲奸入爲湖廣道御史時重建太廟有希上意者奏當倣周制七廟以憲宗爲祖興獻帝爲考唐極言其非疏入世宗震怒覽其疏擲地者三浹旬後得旨罰俸邪議遂寢巡按陝西以劾仇鸞降湖廣布政司照磨陞國子監博士累陞湖廣

嘉興府志

卷五十四

嘉善列傳

五

副使 分省人物考參嘉禾徵獻錄

錢貞字子元博學積行嘉靖丁酉順天鄉薦授福建尤溪令操守峻潔愛民好士陞汝甯府同知悉心佐政保民如赤子代去百姓攀援不忍舍夾轂焚香追送數十里而後返以入覲卒于京師汝人聞之爲之巷哭著有實政錄其在信陽捐俸薪以完逋賦西平則均馬政以省夫役確山則修庠校祀呂先生于鄉賢皆政之卓卓者嘗修尤溪志詳于土田戶口賦役尤人德之立碑祀名宦

兩浙名賢錄參嘉善楊志

陸邦字秀卿嘉靖丙戌進士初任南刑部嚴嵩方爲翰林



求訂交拒不納嚴令人私詢其意邶曰此人雖有時名實奸雄也嵩銜之歷任兵部武庫出知武昌徙岳州在任崇節儉寬逋息訟措牛種開荒蕪歲飢竭倉以賑活飢民數百萬時嵩已柄政銜前事十年不調御史伊毓生巡歷至岳邶供奉甚薄伊怒直入其署惟老蒼頭二人敝筐無鎖檢之殘書百帙布衣數事而已特疏薦陞京堂邶至都不謁嵩嵩遣人諷之邶曰受職天朝拜恩私第賢者不爲况未受官而先謁權貴乎卒不往陞太僕少卿轉光祿正卿以僉都御史撫河南乞歸

錢于鄰字德卿嘉靖丙辰進士授邵武知縣歷官四川按

察司僉事性儉樸絕無宦情孤立行意而已

以上嘉禾徵獻錄

丁賓字禮原隆慶五年進士授句容知縣徵授御史大學士張居正賓座主也誣劉臺以賊屬賓往遼東按之賓力辭忤居正意去官萬曆十九年用薦起故官累遷南京右僉都御史兼督操江江防多懈賓率將校乘一舟往來周視增守兵戍要害部內晏然南衛世職率赴京師請襲留滯不得官賓請就南勘襲妖民劉天緒左道事覺兵部尚書孫鑛欲窮治之詔下法司訊鞠賓兼攝刑部大理事力平反論七人死餘皆獲釋召拜工部侍郎尋擢南京工部尚書自上元至丹陽道路盡易以石



行旅頌之數引年乞罷光宗立始予致仕賓官南都三十年每遇旱潦輒請賑貸時出家財佐之初以御史家居及丁憂歸連三年大飢咸捐資以賑至天啟五年復捐粟三千石賑貧民以資三千金代下戶之不能輸賦者撫按錄上其先後事時已加太子少保詔進太子太保旌其門以年高三被存問卒年九十一諡清惠

明史

朱鳳字文瑞貢生爲邵武教授郡有淫祠賽祭無虛日鳳往以杖擊之像自塌壞二子賢愚賢字汝賢以貢官沔陽學正戶部蕭某從賢受經讞獄至浙有大姓坐法論死用賄乞求末減賢卻之愚字汝明負氣節會上書規

嘉興府志

卷五十四

嘉善列傳

七

郭縣令郭謝過表其書于門以示悔任松江府訓導

嘉禾

徵獻錄

孫朝宗字賓江至孝事父百歲翁嵐及母鍾依依孺慕寢食未嘗不在側伯兄朝宰病瘵早世哭之慟啟其衾同臥曰今而後不復與兄同此被也隆慶丁卯鄉薦授福建順昌令歲大祲捐俸易家產佐賑全活數萬邑設關舊有私稅請除之沒祀名宦錢士升爲立傳

嘉善楊志

錢吾德字湛如食貧力學萬曆初禾郡推三名家一爲袁了凡一爲馮具區一卽吾德時人咸以公輔期之庚午舉于鄉秉鐸苕上擢遷安令多惠政邑爲閭藪槩不與



通補泰甯令益砥清白有置黃金于茗器以饋者密封還之民苦逋賦爲核產分戶均役平輸邑產斷腸草民有憤鬪輒輕生食之吾德令犯法者拾草多寡以贖罪重輕期年根莖盡絕移守甯州大水矯檄發賑居官不潤脂膏居家不問生產凡焚券裂責助婚助葬皆歡喜爲之子繼登有傳次子繼振鄉貢不仕以孝友聞繼章

崇禎丙午舉人

嘉禾徵  
獻錄

毛汝賢字見吾嘉靖丙辰進士授鳳陽府推官累陞郎中降南禮部員外遷大名兵備副使汝賢性坦夷不留宿忿其調禮部以御史周宏祖劾之故論降及在大名宏

嘉興府志

卷五十四

嘉善列傳

八

祖適爲屬吏于公事無纖介嫌宏祖亦詳其行事大愧

服焉

嘉禾徵  
獻錄

朱廷益字汝虞萬曆丁丑進士爲漳浦令歲比不登捐俸賑飢全活甚衆補令嘉定時苦漕兌請于大司農改折二十萬石歲省民財以五萬計奏最得南儀部遷考功擢僉事督江西學政屏絕干謁益王餽古琴受而檄諸學宮曰此琴貯文廟以彰賢王崇儒雅意翌日王以妃弟囑廷益謝曰校閱時何由私識執法所以敬王也發

卷置劣等擢南通政司參議

馮夢禎  
行略

支大綸字心易萬曆甲戌進士試政西曹時江陵秉政進



白燕紅蓮以爲瑞綸言於朝曰大臣不宜稱祥瑞啟侈  
心遷泉州司理時侍郎洪朝選失江陵意欲中以法乃  
爲書具陳天道人事不宜枉殺大臣以媚人江陵益噤  
之遂罷官又七年推補江西藩幕遷奉新令復與上官  
不協掉首而還卒門人私諡文介先生著有嘉隆編年  
史華平集行于世子如玉有傳樵李詩繫

王慎德字允明萬厯庚辰進士知萬安縣力鋤豪強有能  
聲行取廣東道御史出按廣東復按四川與討平楊應  
龍之亂上功將遷值竝封事起疏請建儲甚力忤旨罷  
光廟立追贈光祿寺少卿

葉繼美字含章萬厯癸未進士知金溪縣清寃滯丁憂補  
蕪湖擢刑科給事中彈劾不避當路請建儲停礦稅及  
疏救王錫爵高攀龍甚力出典湖廣鄉試累進吏科都  
給事中以疏阻東事削籍後東事敗一如繼美言終不  
得申理子培恕字行可崇禎甲戌進士知崑山縣考察  
降福建按察司照磨不赴歸以上嘉禾徵獻錄

袁黃初名表字坤儀仁子黃少負異才于三乘四部星維  
諸書無不研究萬厯丁丑會試擬第一以策忤主試被  
落後改名黃至丙戌始第授寶坻知縣邑諸役倍于田  
賦車運皇木爲甚黃請由會通河運入移皇木廠於三



賢祠北使濱水受木便臺使爲奏報可因盡革重夫重馬採石及箭手諸役邑田窪下比歲大潦黃浚治三仝河築隄捍之海水時溢入爲患令海岸多植柳高數尺潮退沙遇柳卽淤漸成隄因于隄內地開溝墜課耕種曠土大闢遷兵部職方司主事適倭侵朝鮮朝廷大舉東征經略薊遼宋應昌請黃贊畫與劉黃裳浮海渡鴨綠江調護諸師提督李如松桀驁自恣黃數其罪大恨與黃裳比而搆之未發如松大敗于碧蹄館兵部尙書石星意主款黃亦以將驕兵罷上書于星未幾而如松以十罪列黃黃遂以京察免歸熹宗立吏部尙書趙南

星追敘東征功贈尙寶司少卿子儼字若思天啟乙丑進士授高要知縣悉心籌畫興革甚多雨潦漲城中水深三尺儼走暑雨中竭力揀援治苦蓋作粥糜倚工撈溺斂瘞浮骸入秋淫霖不止米價騰踴細查貧戶而親給之以勞瘁嘔血猶親民事遂不起士民市唁巷哭如喪所生

吳江志參嘉禾徵獻錄

錢承統字道光少孤事兄以禮從杜偉講學松陵獲聞羅念庵主靜之旨製一木榻晝夜危坐其中刻苦提撕後

漸進平實

嘉善章志

丁寅字直原幼敏嗜學入北雍無所遇遂屏舉子業遊王



畿唐樞之門講身心實學事母盡孝敝衣蔬食人稱爲

篤行云

袁志

曹津字元會諸生以貢歷南安府教授課士有程調貧生

卻贈賄秋毫無所苟著周禮集傳

嘉善楊志

陳于王字用賓萬歷丙戌進士授魏縣父憂服闋補句容

甫下車申飭保甲法奸宄屏息凡徵收節縮必殫思斟

酌據道理遠近立爲限嚴胥吏出入防其侵擾聽訟多

以理論令兩造自釋遷刑部主事士民擁道遮留若失

慈父母于王以祖母年九十告改南兵部督龍江關稅

中官在南者亦設科稅于儀真撓于王權于王曰該監

嘉興府志

卷五十四

嘉善列傳

士

不得侵本部職重困商民有假中旨橫索者以法從事

遂止不復稅調吏部陞湖廣按察司副使兵備武昌值

淫雨漢水暴溢穀騰貴羣盜並起山谷深僻有數大姓

實爲盜首于王練兵按甲弗動檄諭何陳徐譚等十二

姓反覆開導于是縛其渠魁以獻盜悉平尋陞四川按

察使未蒞事歸逾年改推福建命下以疾卒子山毓龍

正有傳

沈道原號淮槎科子萬歷乙未進士授樂安令以病歸樂

安士民挽留甚切改松江教授陞國學尋轉工部主事

歷改吏部道原在松江知青浦知縣某貪墨無狀及司



察遂斥之青浦民咸以爲快調文選司以病告歸道原業可自給入官後中落人稱其清操

以上嘉禾徵獻錄

馮盛典字桂海萬厯辛丑進士授刑曹出守歸德遷兩淮運使與巡鹽爭禮至上聞詔令抗禮累遷河南布政使謝政歸莊則孝字翼庵戊戌會試辛丑廷試授福建興化推官平反無疑獄陞禮部主客郎乞歸行李蕭然沒祀鄉賢沈萬鈞字玉臺鄉薦後力學著書有詩經類考

傳世

嘉善楊志

曹穗字泰字家貧事父極孝養撫幼弟以恩婚喪之儀必式於古祭必齋器物必夙戒覃思性理河洛之言期月

嘉興府志

卷五十四

嘉善列傳

三

間鬚髮爲白執經者甚衆魏忠節大中出其門生平無疾行無惰容無譁語無違心之言無欺人之事子勳有

傳

嘉善章志

夏九鼎字台卿少從顧憲成學萬厯間鄉薦北上憲成屬其請益於李材時材官兵部侍郎誣下獄九鼎從獄中受講登進士卽抗疏白其冤釋褐疏爭三王並封事艱歸補新喻令調安福皆清操自勵多政績上計卒於道貧不能殮生平秉禮蹈義晝所爲夕必書之任安福時

莫敢干以私人稱爲夏鐵耳

袁志參西江志

錢天允字延之萬厯辛丑進士知攸縣勤慎樸素革除羨



餘贖鍰豪猾望風束手毀諸淫祠尤詳慎刑獄民無冤  
濫入爲工部都水司主事進兵部郎中卒祀鄉賢嘉禾  
徵獻  
錄

毛尙忠字誠庵萬厯甲辰進士厯海澄棗強令皆有治績

陞工部主事杜絕中貴人請託光宗在東宮異之書承

恩堂額以賜遷雲南僉事弟尙質尙文尙質字素庵狷

介重然諾尙忠卒子幼尙質撫育遺孤辛勤備至尙文

字郁庵以鄉貢爲新昌訓導一作  
餘姚巡按以其才檄令查

盤一郡庫藏積弊釐剔殆盡遷紹興府教授嘉禾徵獻  
錄參吳志

計元勳號明葵萬厯丁未進士由南銓部郎出爲山東參

嘉興府志 卷五十四 嘉善列傳 三

政分巡濟南東省謀建逆璫生祠遂挂冠歸爲人敦慤

有古風宦轍所至咸著清節居家杜跡城市鄉黨推爲

祭酒嘉禾徵  
獻錄

蔣英號吧瞻萬厯庚戌進士初令松溪調漳浦服闋補宜

興爲江南劇邑賦煩民困英愛民執法薪米之需咸取

給於家厯遷南刑禮二部主事旋改南驗封司郎中轉

福建副使未之官時璫逆勢焰已極英與周宗建爲姻

家因于推升疏內批蔣英依傍門戶著革職忠賢敗以

故官分巡蘇松坐事貶秩未行而宜興民變上官以英

先治宜興得民心檄之撫治單騎往諭法豪家僮客數



人令亂民自獻其首惡亂遂定宜興故多豪家修撰陳于泰編修陳于鼎兄弟尤橫遂激民變執兵鼓譟勢洶洶賴英事旋定而周延儒方枋國與陳氏有連銜英再貶兩秩遂歸

嘉禾徵獻錄參明史

錢士升字抑之萬厯四十四年殿試第一授修撰天啟初以養母乞歸進左中允不赴高邑趙南星同里魏大中受璫禍及萬燦杖死追贓皆力爲營護破產助之起少詹事掌南京翰林院卽謝病歸後起南京禮部右侍郎署尙書事祭告鳳陽陵寢疏陳戶口流亡之狀甚悉拜禮部尙書兼東閣大學士入朝請停事例罷鼓鑄嚴贓

嘉興府志

卷五十四

嘉善列傳

十四

吏之誅止遣官督催新舊餉第責成於撫按帝悉從之帝操切溫體仁以刻薄佐之士升因撰四箴以獻大指謂寬以御衆簡以臨下虛以宅心平以出政其言深中時病帝雖優旨報聞意殊不懌也無何武生李璉請括江南富戶報名輸官行首實籍沒之法士升擬旨下刑部提問帝不許體仁遂改輕擬士升曰此亂本也當以去就爭之乃疏言自陳啟新言事擢置省闈比來借端倖進者實繁有徒然未有誕肆如璉者也郡邑有富家固貧民衣食之源也地方水旱有司令出錢粟均糶濟飢一遇寇警令助城堡守禦富家未嘗無益於國周禮



荒政十二保富居一今以兵荒歸罪於富家腴削議括其財而籍沒之此秦皇不行於巴清漢武不行於卜式者而欲行於聖明之世乎今秦晉楚豫已無甯宇獨江南數郡稍安此議一倡無賴亡命相率而與富家爲難不驅天下之民胥爲流寇不止或疑此輩乃流寇心腹倡橫議以搖人心豈直借端倖進已哉疏入而璉已下法司提問帝報曰卽欲沽名前疏已足致之毋庸汲汲前疏謂四箴也士升惶懼引罪乞休帝卽許之弟士晉由進士除刑部主事崇禎時以山東右布政擢雲南巡撫築師宗新化六城濬金針白沙等河平土官岑儂兩

嘉興府志

卷五十四

嘉善列傳

五

姓之亂頗著勞績已而經歷吳鯤化訐其營賄體仁卽擬嚴旨欲因弟以逐其兄命下而士晉已卒事乃已

明史

錢棫字去非原名格士升子少從婦翁吳兵部志遠講求性命之旨崇禎庚午漳浦黃道周典浙試得其牘謂必老師宿儒置第八及謁見年僅弱冠黃益嘆賞爲人厚重寡言不妄交與鄉舉後益刻勵學問道周以言事下獄棫納橐餽不避險難後講學杭之大滌山棫病起褰裳往從竟中風露卒年三十三道周呼其名而慟之曰

吾道無傳矣

姜採撰墓志

錢棟字仲馭士升仲子崇禎丁丑進士授南職方轉郎中



察軍政剔夙弊中涓欲有所撓糾之不少枉南都稱健  
決郎遷廣東僉事請終養棟伉爽豪邁其天性而言呐  
呐如不出口至於處大事決大疑臨大節雖古剛介大  
臣不是過甲申都城陷棟方病嘔血聞北耗糾兵勤王  
慷慨誓師聞者感激泣下一切糧餉皆破產爲之乙酉  
八月殉節震澤生平博綜正史兼採漢魏六朝諸名家  
皆有成編尤好爲詩夏夏去陳論者方之李長吉所著  
有少司馬新艸儒園文部余懷撰傳參  
樞李詩繫

錢梅字彥林士晉子崇禎癸酉舉人兵部職方司郎中國  
破死梅子默字不識崇禎癸未進士知嘉定縣鼎革後

嘉興府志

卷五十四

嘉善列傳

六

不知所終或言其爲僧名成回卒於越之顯聖寺有吹

簫草

嘉禾徵  
獻錄

錢繼登字龍門萬曆丙辰進士授刑部主事有珠商與大  
璫乾沒帑金鞠訊不少貸轉郎中摘猾胥奸弊守饒州  
修復芝山書院與諸生講學陞蘇松副使謫歸崇禎末  
起江防都御史未赴淮揚失守歸卒年八十餘著壑專  
堂集東臬問耕錄易窺南華拈笑孫武子繹等書弟繼

振繼章有傳

吳志參嘉  
禾徵獻錄

周宗文號開鴻萬曆丙辰進士令清江築隄以捍章貢諸  
水邑多盜廉得爲首者捕斬之黨悉散行取貴州道御



史時廣甯失守疏糾兵部尙書張鶴鳴緩師玩寇請明正國典以儆後人京師大雨雹疏請扶陽抑陰時宦寺專寵惓惓以君子小人消長爲言不報值三案會議宗文持論侃侃大璫銜之幾及禍以艱歸起尙寶卿請卹死節諸臣糾李承祚等附璫之罪引疾歸再起光祿推京尹爲柄國者所抑解綬歸弟丕顯字知徵天啟辛酉舉人時若有朗悟甲申三月忽呼同年曹勳陳龍正及兄宗文謂之曰國家有大故期且不遠余死不及見諸君好爲之有頃捉鼻而逝後十餘日國破如其言

嘉禾徵獻

嘉興府志

卷五十四

嘉善列傳

七

魏大中字孔時自爲諸生讀書砥行從高攀龍受業家酷貧意豁如也舉於鄉家人易新衣冠怒而毀之萬曆四十四年進士官行人天啟元年擢工科給事中楊鎬李如楨旣論大辟以僉都御史王德完言大學士韓爌遽擬旨減死大中憤抗疏力爭詆德完語并侵熿帝爲詰責大中御史周宗建徐揚先張捷徐景濂溫臬謨給事中朱欽相右德完交章論大中久而後定明年偕同官周朝瑞等兩疏劾大學士沈灌語侵魏進忠客氏及議紅丸事力請誅方從哲崔文昇李可灼且追論鄭國泰傾害東宮罪持議峻切大爲邪黨所仄目太常少卿王



紹徽素與東林爲難營求巡撫大中惡其人特疏請斥紹徽紹徽卒自引去再遷禮科給事中是時恤典冒濫每大臣卒其子弟夤緣要路以請無不如志大中一切裁以典制遷吏科都給事中大中居官不以家自隨二蒼頭給爨而已入朝則鍵其戶寂無一人有外吏以苞苴至舉發之自是無敢及大中門者吏部尙書趙南星知其賢事多咨訪朝士不能得南星意率怨大中而是時觚排東林者多屏廢方恨南星輩次骨給事中章允儒江西人也性尤忤嗾其同官傅魁假汪文言發難文言者歙人初爲縣吏智巧任術負俠氣入京輸貲爲監

生用計破齊楚浙三黨察東宮伴讀王安賢而知書傾心結納與談當世流品光熹之際外廷倚劉一燦而安居中以次行諸善政文言交關力爲多魏忠賢旣殺安府丞邵輔忠遂劾文言褫其監生復逮下吏得未減益游公卿間大學士葉向高用爲內閣中書大中及韓爌趙南星楊漣左光斗與往來頗有迹會給事中阮大鍼與光斗大中有隙遂與允儒定計囑魁劾文言并劾大中與光斗等交通文言肆爲奸利疏入下文言詔獄大中時方遷吏科上疏力辨詔許履任御史袁化中給事中甄淑等相繼爲大中光斗辨大學士葉向高以舉用



文言亦引罪求罷獄方急御史黃尊素語鎮撫劉僑曰  
文言無足惜不可使搢紳禍由此起僑領之獄辭無所  
連文言廷杖褫職牽及者獲免大中乃遵旨履任視事  
楊漣疏劾忠賢大中亦率同官上言忠賢得疏大怒矯  
旨切讓尙未有以罪也大學士魏廣微結納忠賢表裏  
爲奸大中每欲糾之會孟冬時享廣微偃蹇後至大中  
遂抗疏劾之廣微愠益與忠賢合吏部推謝應祥巡撫  
山西廣微遂嗾所親陳九疇劾大中出應祥門推舉不  
公貶三秩出之外盡逐諸正人吏部尙書趙南星等明  
年逆黨梁夢環復劾文言再下詔獄鎮撫許顯純自削

贖以上南星漣光斗大中及袁化之繆昌期周朝瑞顧  
大章李三才輩無所不牽引而以漣光斗大中化中朝  
瑞大章爲受楊鎬熊廷弼賄矯旨俱逮下詔獄鄉人聞  
大中逮去號泣送者數千人比入鎮撫司顯純酷刑拷  
訊血肉狼籍其年七月獄卒受指與漣光斗同夕斃之

莊烈帝嗣位贈大中太常卿諡忠節錄其一子

明史

魏廷相字翊卿大中從弟萬曆甲辰進士授汝陽令始至  
卽開河以便漕輓居官清約人不取干以私嚴持吏胥  
令不得黷法邑中春耕無桔槔取水爲艱廷相乃令倣  
吳農作車戽水于是濱河之地皆可種稻墾荒數萬畝



民號魏公車服闋補棗強行取四川道御史未受事卒

嘉禾徵  
獻錄

曹烈字允和更字鴻甫幼不好嬉動作有度通曉圖書天文地理已謂無益身心性命遂矢志濂洛之學卒年二十八語弟子魏學泚曰吾肢體日就銷脫而靈覺不滅於舊卒之日從容言別神色不亂著蒙養錄果行編新纂魏學泚字子敬少隨父大中讀書破寺中刻苦勵志大中以璫禍被逮學泚號呼泣血欲隨侍入都大中厲聲曰若智出孔文舉八歲兒下耶奈何以完卵狗覆巢學泚易姓名密隨檻車行不令父知入都潛匿邸舍暮夜叩

嘉興府志

卷五十四

嘉善列傳

三

當途父執無能發公憤者欲上書代父不得痛不欲生大中旣斃獄中遑遽扶櫬歸里見母痛絕仆地跡不入中閫日夜伏草啼號家人間進粥糜輒揮去曰詔獄中安得有此淚盡繼之以血遂死死二年弟學濂伏闕訟大中寃并白學泚死孝狀又瀝血上疏劾阮大鍼傅樾交通逆奄實殺諸臣制詔褒美曰以爾臣忠彰爲子孝泚濂之義生死同揆學泚許配父祠癸未學濂成進士入翰林時賊陷太原濂請東宮或二王往鎮南服又言當糾合畿輔義士爲勤王師城陷作絕命詞自縊死濂豁達多大略痛父詔獄之慘終身布衣無重味母病



臂肉和藥進乃瘳

樵李往哲編

李奇珍字四可萬厯進士知長樂縣定役緩徵興利剔弊

任九載召入兵戶二科有爭國本止開礦議營田陳星

變諸疏陞太常寺卿家居十五年無一字入長安卒祀

鄉賢長樂有雙清特祠

袁志

李奇玉字元美幼擅文名與兄奇珍有二李之稱萬厯癸

卯舉於鄉研思易學時高攀龍講道東林奇玉北面就

正忠憲勸之曰發吾蘊者子也天啟壬戌魁南宮厯遷

兵工兩曹再守汝甯數月引疾歸發篋中所箋註研晰

疑義不停筆者十年雪園易義成大旨與師說相發明

嘉興府志

卷五十四

嘉善列傳

三

甲申聞變悲憤卒學者稱荆陽先生子松崇禎庚辰進

士官歛縣令

儒林傳參嘉善楊志

吳志遠號蘧庵舉孝廉三十年未嘗謁官府就教烏程擢

翰林孔目改禮部司務時尙書孫慎行爭紅丸事託志

遠詮次章奏屬意用之志遠力請就閒轉南兵部郎璫

禍發嘆曰吾不能如皇甫規自附黨人尙思懷綬乎卽

告歸年八十終子亮中順治壬辰進士戶部員外郎

袁志

參嘉善楊志

卞洪載字子厚從高攀龍遊獲聞性命之旨崇禎間兩舉

徵辟不就晚舉鄉飲賓亦不赴著有辨邪說持敬省察



約言綠雪軒詩行世

嘉禾徵  
獻錄

郁調元字涵真性孝鄰失火從烈焰中負母出踰垣涉河  
兩踝皆裂父母歿廬于墓側饗祀必哭終其身如一日  
以廩例入國學謁選得儀封丞司河務秋水衝溢濬築  
盡瘁河賴以平遷遼陽參軍單車赴遼區畫邊備嚴汛  
守募勇敢儲糗糧廣芻牧放古金城方略召丁壯給牛  
種耕具于山之右墾田萬畝鄉人有戍遼失所者厚給  
之致政歸以子之章贈如其官

袁志

顧際明字良甫曾祖謹有義行父態見孝義際明萬厯己  
丑進士選庶吉士為雲南道御史請告養母丁憂起河

嘉興府志

卷五十四

嘉善列傳

三

南道上言播酋應龍必叛宜早為之備未幾應龍叛隨  
奉命按廣西事竣歸上方以言官交爭國本遷怒臺省  
遣斥三十餘人際明與焉天啟踐阼求言陞太僕寺少  
卿先是際明在臺巡視太僕洞悉馬政之弊至是益甚  
乃刻意節省減費不貲以黨禍將起引疾歸

嘉禾徵  
獻錄

陳龍正字惕龍父于王福建按察使龍正遊高攀龍門崇  
禎七年成進士授中書舍人時政尚綜覈中外爭為深  
文以避罪東廠緝事尤冤濫十一年五月熒惑守心下  
詔修省有哀懇上帝語龍正讀之泣上養和好生二疏  
略曰回天在好生無過減死臬陶贊舜曰罪疑惟輕是



聖人於折獄不能無失也蓋獄情至隱人命至重故不貴專信而取兼疑不務必得而甘或失臣居家所見聞四方罪犯無甚窮凶奇謀者及來京師此等乃無虛月且罪案一成立就誅磔亦宜有所懲戒何犯者若此纍纍臣願陛下懷帝舜之疑甯使聖主有過仁之舉臣下獲不經之愆蓋陰指東廠事也其冬京師戒嚴詔舉堪任督撫者御史葉紹顒舉龍正久之刑部主事趙奕昌請訪求天下真賢才帝令奕昌自舉亦以龍正對帝皆不用龍正居冷曹好言事十二年十月彗星見是歲冬至大雷電雨雹十三年二月京師大風天黃日晷淡旬

不解龍正皆應詔條奏大指在聽言省刑時議欲用龍正爲吏部御史黃澍以僞學詆之十七年正月左遷南京國子監丞甫抵家而京師陷福王立於南京用爲祠祭員外郎不就南京不守龍正已得疾遂卒

明史

孫朝亡號賓瀾諸生入成均爲廣東藩司首領官有兄弟構訟經年不息者朝亡取具詞裂之諭以一體至愛二人恚悔各謝過獄地卑溼瘕死狼藉別營高敞徙居之遇大水立括贖鍰佐以薪俸扁舟風浪中且拯且賑他若平治道塗庀葺黌序立義倉以備荒禱皆長治久遠之計晉階奉直大夫三舉鄉飲賓粵中祀名宦邑祀鄉



賢禾郡  
雜記

陸敷錫字德承光祿丞遷柳州通判署象州事安仁土司何公思等聲言花蘆古陳諸賊倡亂請爲朝廷除之其實欲藉此剽掠爲奸邊地居民騷然聚衆數萬與土司相攻殺上官遣吏往慰諭之不解賊曰卽欲撫我須陸通判來敷錫單騎往撫遂帖然散去尋署賓州事時斷藤峽雖平然道險民少間爲山賊竊踞敷錫乃相要害移置衛所一十九處由是山賊遠遁以母老乞歸浙江通志

柯元芳字月傳崇禎進士授建甯府推官署甌甯浦城接壤甌甯江山麻靛賊盤互剽掠元芳募壯勇設關謀擒

嘉興府志

卷五十四

嘉善列傳

雷

賊首五大王餘黨竄伏元芳還郡而監司僨師以遺寇訐元芳坐鐫級已而賊嘯柘浦約日取浦城元芳訶知之午夜勒郡邑兵分道掩捕質明七十餘酋反手就縛諸大吏驚相告曰是果能辦賊非縮朒縱賊者當元芳鐫級時屬邑令夏允彝與直指抗辨而閩人亦相率訟言之卒用得直解官歸居十五年而卒元芳天性至孝初釋褐得父平安信忽心動急馳歸而父病劇侍母終身如孺子歡居鄉多行陰德著述自娛子聳有傳浙江通志

參嘉善  
楊志

曹勳字允大崇禎戊辰會元授庶吉士官至禮部侍郎時



門戶角立勳負時望在講筵每隱護正類魏大中被逮周旋患難吏垣章正宸言事下獄請救得釋乞養十年留都召起見時事日非規切相臣尋以母喪歸勳精於易著易說三卷祀鄉賢

樵李詩繫參  
嘉善楊志

沈鴻起歲貢就教累轉太湖教諭左良玉以師東下人勸其去鴻起毅然曰吾木鐸明倫而苟免君父之難乎卒死于寇闖門一十三人俱遇害

明史

徐遠字道招少孤力學崇禎癸未進士任中書國變堅臥不出長吏至門輒辭以疾葛巾野服三十八年不改

吳志

參嘉善  
戈志

嘉興府志

卷五十四

嘉善列傳

五

陳揆字子眾平居節儉自謹好周人急遇歲旱設法救荒少善病絕意進取專心學古于經史多發明晚歲研悅性理所著有省心日記十卷弟修字子近專攻三禮貫穿六經有經緯書分九部藏于家

袁志參嘉  
善楊志

沈崗字若英本姓蔡性沉毅端謹究心濂閩受業百餘人一時稱為安定弟子兄弟五人友愛無間言皆諸生

嘉善

楊志

丁鑛字九貢賓子恩廕當得官不就中辛酉副榜研究宋元諸儒宗旨身體力行化畛域忘喜愠與人語嘔煦惟恐傷之然外和中嚴不苟同雖燕處必整飭盛暑未嘗



脫帽露頂邑令以望重造請見率婉辭以謝不問戶外者四十餘年日手一編凡論人物臧否政事得失皆窮極源委若鬻產償族孫逋賦歲饑發粟賑濟其爲善多類此卒年八十七

嘉善志

沈龍翼崇禎十七年以府試第一入庠年已五十順治二年王師臨境是日戴儒冠登東亭橋赴水死時有訓導錢一選陳鶴鳴在城亦死於兵

嘉善萬志外紀

國朝

錢楞字芃生士晉子順治三年隨征入閩署將樂令會山寇吳長文等竊發建甯失守將樂被圍城中無兵楞與

嘉興府志

卷五十四

嘉善列傳

三

丞方抗督鄉勇登陴拒之堅守九月城碎率家丁夏允中沈貴等巷戰手刃二賊馬蹶被殺家丁死者數人雍正五年楞孫禮部侍郎以境陳奏 贈按察司僉事祀

功臣廟

福建名宦冊

柯聳字素培己丑進士授棗陽令邑當楚豫關陝之衝流寇穴西山數出爲患聳厲衆登陴寇旋散舊帥孟應學歸誠返蜀道由襄有利其資者誣爲奸宄下獄死聳廉其枉盡釋其家以卓異授禮科前後歷五垣凡十九年奏疏凡五十七上如請卹楚省凋敝蠲吳江歲租及建言春秋宜四傳竝重不得專主胡傳又請以理學名臣



方孝孺從祀皆卓卓可傳轉通政使參議乞養歸著有  
存古堂文藁霽園詩集子崇樸維禎有傳鄧枚陝西甯

夏兵備道

嘉善  
崔志

郁之章字衷恒順治己丑進士歷官分巡道駐上杭時海

寇入漳聲言來攻人情驚恐之章以靜持之密約城守

張國棟整飭營伍趣士民集演武廳手草檄以忠義激

發士民咸願効死賊知有備而退陞大理寺丞以譴歸

杜門課孫獎掖後進執經問者甚眾纂修邑乘若干卷

福建名宦冊

參嘉善戈志

沈鱒字木門順治辛丑進士知建安縣事兵燹後土田荒

嘉興府志

卷五十四

嘉善列傳

七

蕪蠹胥巧爲影射鱒廉得實窮治不少貸先是藩廝以

錢貸窮民勒息數私禁榜掠有鬻妻孥以償者官莫能

制鱒曰愛一官而脅於輿隸使民無告吾恥焉捕置之

法民大悅

浙江  
通志

張茁字文葭順治壬辰進士家貧四世不異爨兄芷早亡

撫其子如己子歷部郎出爲安慶守開荒田二千餘頃

其請蠲請賑諸書民頌之有流涕者以註誤歸

袁志

吳亮中字寅仲與錢繼振郁之章魏學濂學洙學渠曹爾

堪蔣玉立稱柳洲八子構來問堂鍵戶力學順治己丑登

進士授戶部主事督理漢中糧儲有頌聲轉員外郎

樵李



詩繫

孫籀字潔初順治己丑進士任山西學道稱得人大學士  
陳廷敬吳璵侍郎田逢吉皆其所拔士尋補福建糧道  
值廈門用兵先時籌餉刻期奏捷移鎮靈武開屯治河  
在安廬撫凋瘵鋤豪猾修學校善政畢舉轉南汝因辦  
公馳驅墮馬傷足告歸每去任士民鐫碑建祠卒祀鄉  
賢子復煒由縣尹陞主政復煇有傳嘉善  
戈志

沈鼎字止岳順治己丑進士隨征入粵授肇高道適蒼梧  
陷獨守孤城二載又平洞荷諸寨山賊陞福建海道築  
隄防通水利廢墜悉舉轉徽甯道吳  
志

嘉興府志

卷五十四

嘉善列傳

三

丁彥字文博順治己丑進士授工部都水司主事督理江  
南蘆政有政聲著有暇日堂集行世子  
志

丁旭字子葵父洪夏夢歸子慕入其廬是夕生旭及長號  
慕庵砥志礪行講身心實學其慮周憂世有類西山胸  
中灑落有類濂溪我

朝徵修明史學使李文襄公薦之於朝書成議敘當得官念  
親老不仕父母沒哀毀盡禮廬墓以居卒年七十八著  
有寶晉齋初刻再刻二集明史稿子  
志

曹爾堪字子顧勳子順治壬辰進士選庶吉士性強記博  
覽能舉原委輿圖要害山川形勢指畫纖悉聽者神聳



歷陞侍講學士屢蒙

聖祖嘉寵有曹爾堪學問最優之語罷歸偕二三老友選勝賦詩與宋琬施閏章沈荃王士禎王士祿汪琬程可則稱海內八家有南溪集行世子鑑平鑑章有傳攜李詩繫參嘉善戈志

魏學渠號青城順治戊子舉人授成都府推官時蜀中初定戶口尙少民疲于差役學渠招撫緩輯定嘉眉邛雅四州賦額公私稱便舉博學鴻詞陞刑部主事歷官江西分守湖西道加意撫綏務從寬簡其俗生女多溺死嚴爲之禁生全者甚衆生平輕財好施親友緩急立應

嘉興府志

卷五十四

嘉善列傳

三

從祀名宦鄉賢

浙江通志參吳志

周宸藻號質庵宗文子順治乙未進士由庶常改御史屢陳時務禁旗丁勒索請清查倉穀皆切中窾要巡兩淮

鹽課罷歸擅書工詩有柿葉齋詩集

吳志

夏長泰字季保原籍華亭父嘉遇官考功郎著清望長泰順治乙未進士授文水令輕刑緩徵得士民心擢刑部主事請假歸布素蕭然會蘇松撫臣議築隄捍海推長

泰廉幹請視工事勞瘁卒

嘉善楊志

陸翔華順治進士任鬱林州知州時李定國餘黨未散侵擾諸州縣鬱林參將提兵遠出賊乘虛猝至圍城翔華



率眾登陴固守賊攻不克引去後補廣德州著有惠政

崇祀鬱林名宦

廣西通志參  
嘉善崔志

錢黯字長孺士晉孫弱冠成順治乙未進士授池州府推

官以敏練受知臺使所至輒以自隨以誥誤罷職年甫

三十家居事親盡孝暇益肆力經史百家書法追二王

兼擅潑墨自設科來登第踰七十年者史冊罕見年九

十五卒

嘉善  
戈志

楊應標字勝林順治乙未進士授甯國府推官歷溧陽鄆

陵令牧劍川所至俱有惠政可紀能詩著永思堂集子

恒孫方岳舉人爾德會元有傳

吳志參檇  
李詩繫

嘉興府志

卷五十四

嘉善列傳

三

朱張銘字西渠順治乙未進士授行人司奉使者三屏絕

請謁典試雲南陞戶部主事會長子兆渭能文早世傷

痛卒於京邸

嘉善  
崔志

顧儀字可桂歲貢生授金山衛教授沿海邊邑無廩額儀

請于上創膳堂分經課士文風聿起始登解額

曹相駿  
楓溪小

志

顧耿臣字奕聞際明孫順治戊戌進士知鄆州兵燹後加

意撫綏劇賊投誠約束得宜不為州患陞戶曹典貴州

試尋督權蕪湖秩滿知大名府釐正豪右隱糧有愚民

倡亂止罪渠魁脅從者盡為寬釋民戴其德

吳志參嘉  
善戈志



孫棨字曙東性穎異究心天文河渠由舉人授亳州牧兵後民多逃亡棨勞來安集墾田萬餘建巨橋十一以當滾蕩渠之衝轉開州築城濬河建倉修學積穀三千以備荒歉墾田七十頃舉博學宏詞尋陞兵部郎子裘鏡由縣尹陞綿州牧詩文俊逸著鸞嘯軒稿

顧向字羊舌辛卯舉人授四川蘆山令蘆地荒遠離城三里卽爲天全董北諸土司生熟蠻雜處向竭力撫綏蠻旣帖然民亦安輯時逆孽未靖協辦軍餉具有成績後清田賦豁賠累集流亡葺城郭勸農宣教一以實心舉行比歸囊橐蕭然子鼎升鼎恒至性純篤鼎恒有傳以上

嘉興府志

卷五十四

嘉善列傳

三

嘉善  
戈志

沈湛字淵伯前明諸生踐履篤實當湖陸清獻極推重稱先生而不名慨世人浮薄殘刻無非涉險蹈危因集倫常日用語訓二子瑤璫署名詒安清獻前後兩序之並摘三教合一一條謂偶涉獵於神仙力勸改正立言垂誠衛道基嚴居名五柳村著有閩游草響雪堂古文參

魚堂  
文集

王睿字聖若副貢授興化通判旋陞同知時海禁甚嚴出界捕漁者論死睿原情平反全活者衆著有曠期堂集龔在升字聞園順治乙亥進士爲蘇州推官督漕決獄摘



發奸惡請蠲版荒停修土城爲三吳永利改湖廣通山  
令嚴禁耗羨停薦新茶事事爲民請命卒于官民皆哽  
咽流涕城外山中刻有思公石

以上嘉善崖志

李振宗字欲仙康熙甲辰進士初令陝西禮縣後補湖廣  
蘄水政寬訟簡士民樂業以卓異內陞歷任郎中轉平  
涼府同知以勞瘁卒于官子允符舉人授什邡令有惠

政陞御史

吳志參嘉善戈志

錢霞字赤城四歲而孤事母盡孝庚戌成進士授山東冠  
縣令諮訪利弊嚴保甲勤開墾均賦稅又修葺學宮興  
文教改承德令兼署治中通判有守將欲徙民分戍上

嘉興府志

卷五十四

嘉善列傳

三

陽堡百姓大噪單騎曉諭民乃帖然內陞主事

曹鑑倫字彝士勳孫己未進士選庶常典試山左所拔士  
如何世堪李永紹王沛壇顏光燾王懿輩皆著清望再  
主北闈試歷陞內閣學士預修國史典訓方略膺一

統志副總裁

賜錫類堂匾額以示優寵歷陞吏部侍郎卒年六十三

賜祭葬子源祁貢生源郁源郊有傳源邦舉人雲陽知縣

以上嘉善

戈志

沈辰垣字紫翰乙丑進士授翰林與纂修明史及續唐類  
函羣芳譜諸書又奉



敕繙閱等韻標摘差誤謂吳興識四聲而不識七音失三韻之原四聲爲經七音爲緯辨甚詳悉洵陞侍讀學士尤喜汲引後輩乞歸卒祀鄉賢

丁策字嘉猷康熙乙丑進士爲諸生時遊粵西同里蔣孝修任奉議州判適病亡策經紀其喪并爲申理錢穀之末清者事竣護其柩歸後任昌黎令慈惠得士民心

以上吳志參嘉善戈志

錢以埏字閩行士晉曾孫戊辰進士授茂名令以才能調東莞遷隰州牧內陞員外歷通政特轉少詹事躋清華之列奉

嘉興府志

卷五十四

嘉善列傳

三

命至雞林呱喇甯古埭白都納地方相度形勢設立州縣繪圖入告擢副憲陞禮部侍郎祖楞殉難閩中瀝情叩顙得贈卹簡本部尙書以疾乞休奉

旨褒嘉加宮保致仕卒七十一

賜諡恭恪予祭葬

嘉善戈志

王濤字見平武進士康熙十三年隨征福建授遊擊以勞歿於行間能詩工書不苟然諾子醅業諸生力學修行

于志

丁棠發字卓峰賓曾孫戊辰進士授新安令減耗革積弊恤民訓俗建義學課士月給廩餼特舉鄉飲酒禮繪圖



定儀注士民始知禮讓以才能陞御史潔已率屬綱紀  
肅然歸奉八十老父貧無餘貲承權菽水自號一餐居  
士吳志參嘉善戈志

金皋謝字應台髫年喪母哀毀如成人戊辰進士授莆田  
令莆邑濱海之田常被水災捐俸築隄以捍之延紳士  
重輯邑乘以親老力請終養歸卒祀鄉賢嘉善戈志

陳霆萬字子敦康熙甲戌進士授臨朐縣邑正供四萬餘  
兩向有胥蠹私收包納之弊甚至挈家遠遁累民重完  
霆萬至一變其法散歸業戶使各自輸糧其弊遂革卓  
薦行取病卒祀名宦鄉賢鍾之枚亦甲戌進士任義烏

嘉興府志

卷五十四

嘉善列傳

三

教諭師範端莊儒林推重子承烈字武傳亦有文名江浙

通志參嘉善戈志

孫洙字魯淵康熙乙卯舉人授臨湘令崇尙教化不事鞭  
扑荒歲設法賑濟建啟聖祠設義塾以勞卒于官貧無  
以殮眾爲贈賻得扶柩歸嘉善戈志

張王典字堯若康熙丁丑進士授山西平順縣下車減耗  
費絕苞苴省差徭值歲當編審秉公釐剔從前隱漏之  
弊重役之苦一時頓清陞吏部主事旋擢吏科給事中  
官京七載賃屋數間僅可容膝公餘焚香玩易及卒惟  
圖書數束而已浙江通志



陳培字用楫丁巳舉人授廣東高明令發粟賑濟以恩信  
招撫盜魁俾巡緝地方民得安枕粵有毒草民遇忿爭  
輒服以陷人培以德化之此風遂革任十三載卒于官  
著鳳覽堂文稿粵遊吟行世

嘉善  
戈志

孫衍字宰工康熙甲子舉人授長山知縣在任五年減耗  
羨賑貧乏以病乞休邑人攀轅臥轍者相望于道有廣  
川去思錄建專祠祀之所著長山邑乘孫氏宗譜等書  
許湄字臨洲康熙庚辰進士知湖廣石門縣苗蠻雜處湄  
開誠撫諭諸土司咸格心向化巡撫趙申喬保奏內召  
卒于途居官十五年家無寸椽尺土沒後人益信其廉

嘉興府志

卷五十四

嘉善列傳

三

子王謨王猷有傳

以上浙江通志  
參嘉善戈志

楊爾德字質爲戊戌會試第一選庶常歷陞掌垣條陳學  
政事宜深中窾要視廣東學政歲試甫周以校文勞瘁  
卒于官

詔卹其家

曹源郊字東牧戊戌進士以編修入直南書房充  
實錄纂修官甲辰典試貴州丙午典試廣東冒暑馳驅入闈  
力疾校文榜未發而歿著有桂園詩集

許王謨字端操由舉人分發四川委署宜賓令邑稱繁劇  
又值承辦軍需籌畫無失上官重其才簡往督築雷波



城工在萬山中王謨伐山開道觸犯嵐瘴而卒以上嘉善戈志

孫詠字古喞順治辛丑科

廷試二甲第一故事二甲第一稱傳臚多得館選時更令以推官用及謁選而推官又奉裁授福建南靖縣知縣靖故巖邑奸民率恃險抗糧詠躬歷窮鄉勸諭民感動始樂輸將又嚴私稅之禁新學宮集諸生講經制府范承謨知其才值大計欲薦之而拘於格因先行風示爲循吏勸會捧檄以事往鄰省逆藩變作不得歸

大兵入粵詠夜行晝伏至軍門將軍見制府檄且素知詠有經濟才遂題補潮州府通判丁外艱歸著有廉靜堂集

嘉興府志

卷五十四

嘉善列傳

三

浦文焯字元量康熙丙戌進士選蠡縣知縣地居畿輔習俗強悍難治文焯之官法令一新任九載有奇慈祥愷悌士民稱爲浦菩薩陞正定府同知甫涖任卽擢河間府知府雍正三年直隸巡道改設按察使司卽以文焯陞授尋鐫職歸乾隆初起廢員授福建糧驛道而卒著有鶴貽堂集平恕齋文稿

孫燾字叔荀貢生善詩文侗儻負異才遊川陝賓某觀察所撫軍察公見其詩甚嘆賞延至幕使掌箋奏會山賊

竊發

上諭察往勦燾請從倥偬戎馬間羽書旁午措辦悉中機宜賊



聞察諸邊事皆竄伏謀欲出降而懼誅燾探知之請往  
宣諭單身入賊巢愷切曉諭賊感泣羅拜事平以軍功  
議敘選廣東廉州府同知調肇慶署廉州府知府興利  
別弊所在多惠政後以耳聾致政歸

許王猷字賓穆康熙癸巳進士以翰林累擢少詹事主試  
江南如沈德潛楊大琛吳虎炳倪承茂皆其所得士書  
法力追北海片楮寸簡人爭寶之歸後與里中耆舊仿  
白香山故事爲尊德會居鄉謙厚與人交外和內介累  
官內閣學士兼禮部侍郎年八十卒

孫浚字殿揚康熙丙子舉人選舞陽縣知縣遇疑獄摘伏

嘉興府志

卷五十四

嘉善列傳

三七

如神制府調留省垣使清理積案浚斟酌情理多所平  
反保陞知州薦剡已發矣時制府威重某官素所嗔者  
因公呈議欲吹求以重其罪使浚雜治之浚竟白其寃  
制府怒人咸爲之咋舌浚拂衣曰吾不能殺人以媚人  
也遂引疾歸

顧心錯字嘉集康熙辛卯舉人父秉堅以孝廉教諭會稽  
修學校置祭器歿後門人私謚端毅心錯博學能文通  
刑名家術湖廣衡永道汪櫛以茂材薦授河南溫縣知  
縣調河內邑有漑田渠二偷注越洩爭鬪有死者爲設  
夫司啟閉挨日遞洩民無旱溢之患右族以義男爭繼



速訟幾破家心錯使就讞於邑廟片言而兩造悅服擢  
光州直隸知州光城中貫大渠北城根逼水城中地高  
等女牆民環堞而居圯則盡爲魚鼈心錯捐俸修築密  
排以石下張上斂永無坍決患年老乞歸卒年八十四  
錢家墜字惟若康熙癸巳舉人補湖北鄖西令調南漳漳  
地遼闊奸宄竊發家墜力行編甲互保法盜賊不得發  
又捐俸修千工堰以利蓄洩民名其堰曰嘉善曰水壺  
曰彭城誌勿諉也秩滿陞中書制府奏留題授隨州牧  
丁內艱服闋補直隸保安州歲大祲盡心撫賑災黎皆  
得所後因公降補寶坻令寶坻爲鄉先輩袁黃舊治家  
墜顏其堂曰景袁民有嘉善兩名宦之譽以迴避改補  
山東博山令告歸乾隆甲午重赴鹿鳴宴壽八十一卒  
所著有級居吟稿

朱一蜚字健沖以貢入成均時值準夷草竊

詔命舉茂材異等一蜚以宗人府丞蔡嵩薦

命往陝西軍前岳大將軍鍾琪檄令馳赴鄂爾多斯查點軍旅  
糧儲器械一蜚以書生從事行間約束嚴明指揮如意  
岳深器之歷署高陵麟遊令補韓城調臨潼所在多惠  
政歷陞清河道擢山西布政使旣又移江蘇復調畿輔  
仍轉晉藩一蜚起家縣令二十年中開藩者六護督篆



者再卒以用非其人被議家中貲產祖遺田屋外無長物也羈滯潞安當事延主起文書院講席卒

程鍾彥字驥超雍正癸丑進士入翰林改御史甫視事卽條陳水利他如請寬換照限期添築石道以便行旅等疏皆准行擢禮垣充河南鄉試正考官歷陞太常寺少卿巡視西城奏請禁止附近香山一帶毋許開煤窑巡察東漕相度運河緊要奏請添夫挑浚以收利濟實效凡所疏奏皆見施行著有經義日纂皇華紀程南村堂詩文集

孫惠案榜名觀茫雍正己酉舉人選授山西廣靈縣知縣

嘉興府志

卷五十四

嘉善列傳

三

廣靈地素瘠民欠丁糧多流亡惠案力請上官仿浙西例將丁糧移派田地起科十年帶徵得准行以妻弟朱一蜚任山西布政迴避補山東武城知縣有民婦年六十餘獨居被焚死往驗屋已燼屍自項以下皆焦灼惠案密語幹役曰此縊而後焚者也急緝勿失後廉得眞犯寘之法蓋婦有姪夜盜姑財爲所識以結襪帶絞死焚之以滅其迹遠近稱神明惠案以愛民爲心故所在多實政比去民懷其德不忘

陸偉然字季容乾隆丁巳進士選新樂縣知縣潔己愛民上官皆善視之獨失方伯意請掣回調簡治新樂未及



期人士有清廉敏惠之頌制軍知其剛介委署雞澤縣  
事偉然坐理裕如改補高陽旋以濫應驛馬鐫級偉然  
篤行力學爲文章根柢經史闡發精奧有稼墨軒詩賦  
行世

陳興祚字緒三乾隆己未進士選福建仙遊縣知縣時有  
泉人俞得海越獄拒捕通緝未獲仙邑林姓等七人以  
疑似羅織陷獄興祚廉得其情力請開釋屢觸上官怒  
堅持不撓卒如所請內艱服闋補河南洧川知縣洧故  
瘠土興祚撫字得宜民有起色政尙慈惠而摘發如神  
所至豪強皆斂跡他若賑窮黎新學校毀淫祠均徭剔  
蠹閩豫之民至今頌之

嘉興府志

卷五十四

嘉善列傳

四

陳作梅字燮原乾隆壬戌進士官刑曹由主事遞陞郎中  
歷掌給事中多建白稜稜有風望其任御史時條陳綠  
旗營務及江浙一帶海塘事宜均得議行又有分別原  
衙門注上考之奏遂著爲令巡視津漕奏運弁宜鑄給  
印信及幫船更調之法俱關體要膺外擢分巡雲南迤  
東道旋調迤西後以公事議事白以疾卒著有雪園小  
稿

許椿字董園乾隆辛酉舉人以知縣發四川試用歷署雙  
流儀隴等縣有政聲會



大兵征緬甸蜀省協供騾馬委官督解灌令沈鵬以母老病  
憚行椿慨然請代上官義之調度得宜未半載事竣在  
途不廢吟咏著有南征旅草二卷既補內江令值金川  
蠢動定邊將軍溫福進討檄椿司正林口臺站飛芻挽  
粟軍用以饒又調登春臺站六月師潰賊突至椿率站  
夫力戰以救援不至被執罵賊死事聞

賜卹贈道銜賜祭葬配享雙忠祠廕世襲恩騎尉

錢金殿字鶴雲以塏嗣子髫齡能詩文及長援例選合肥  
丞補江甯知縣陞海州牧擢鎮江守治有寶晉書院幾  
廢矣延師集生徒資其膏火暇與諸生講論經史旋擢

嘉興府志

卷五十四

嘉善列傳

聖

江安糧道本生外艱服闋補江西饒九道署臬篆尋奉  
旨署理巡視南漕御史外吏得此任異數也後以事左遷徐州  
守歷太平廬州以勞卒著有自信紀言靜甯室詩鈔

朱錦昌字畫圃一輩子乙酉順天鄉試舉人謁選大理府  
雲南知縣尋陞雲州知州制府以錦昌熟諳邊事奏調  
騰越州州轄五關七土司土司來謁例佩刀拜跪雖品  
高不稍假錦昌霽顏溫諭得悉其地方土俗并其族姓  
賢否其後隴川因承襲失序擾及內地于千崖蓋達戶  
撒拉撒各處搶掠錦昌與總鎮許世亨隨地鎮壓并誠  
其子姓毋妄動因得無事擢蒙化同知丁內艱服闋補



大關廳同知歷署大理順甯知府所至多惠政以勞瘁卒于官著有產芝室詩集

周翼洙字迪文全錫子以選貢入成均經義於宛平黃叔琳受詩法於長洲沈德潛學日以進甲戌成進士選衢州府教授弟灃字芭東兄弟互相師友以科名非不朽事沉潛於馬鄭賈孔諸書旁通天文輿地兵農經世之務晚尤究心通典通考二書拾遺糾繆不下萬餘條爲諸生二十餘年庚午同兄翼洙舉於鄉辛未會試第一以及第第三入翰林旋以親老乞歸卒

蔡以臺字季實甲子順天鄉試副榜考補景山教習以知

嘉興府志

卷五十四

嘉善列傳

望

縣用不就庚午舉順天鄉試丁丑冠南宮

廷試第一授翰林院修撰尋補

日講起居注官以親老乞養歸以臺自幼穎拔好古博通羣籍鐘鼎圖書金石之品寓目卽辨真贋生平著述多不屬草僅存姓氏竊略六卷

朱鑑昌字宗盛四歲而孤性聰慧及長益倜儻不樂爲經生業援例選縣丞分發楚南尋補通道令改發四川值金川肆逆軍需旁午上官委鑑昌督役修日耳拉山路兼總兩臺甫題補漢州牧以積勞成疾卒

金汝珪字同侯父犖文行重一邑乾隆壬辰成進士授吏



部文選兼考功司主事尋丁母憂扶櫬歸葬時南陽夏鎮間河水驟溢狂飈陡起船欲覆家人掖汝珪將呼他舟載汝珪抱棺痛哭不肯去服闋由郎中擢江南鹽巡道在江南五年累署藩臬儉約自持未嘗一召優伶演劇被議歸卒年五十一

謝墉字崑城乾隆辛未  
召試一第一名授內閣中書壬申成進士入翰林歷官工部侍郎三充鄉會試同考官兩主鄉試兩任學政兩知貢舉一充會試正總裁墉以文章受

知遇甫入詞館卽

嘉興府志

卷五十四

嘉善列傳

三

命上書房行走出入三十餘年其歷掌文衡積學之士多出其門辛丑狀元錢棨鄉會榜首皆墉所取爲  
熙朝盛事後被議降編修仍

上書房行走以疾卒京邸嘉慶五年

上以師傅舊臣追

贈三品卿銜并祭葬著有詩文集書學正說等書

曹焜字素爲乾隆癸未進士選四川新都令疏堤堰以溉田疇均驛站以安夫役民咸便之制府阿爾泰奏調成都兼署華陽以卓異薦歷署嘉定雅州潼川諸府事兩金川逆酋蠢動隨制府桂林專治文書嗣被吏議革職



留任調赴定邊將軍明亮軍前奏開復改授員外郎金川方略館纂修官以繼母年老乞歸養里居十餘載卒王啟焜字東白以新江例選四川大竹丞擢成都令時大兵進勦金川羽書旁午擘畫悉中窾要陞簡州牧尋遷瀘州牧權守夔州大吏咸倚以爲重旋擢成都守晉川東道廓爾喀軍興檄辦打箭爐軍需轉輸迅速大功告成賞戴花翎值川匪滋擾總籌軍務以勞卒

以上伊志

朱潮字學瀾以貲郎爲府經歷洊升長沙府知府攝靈壽縣時遇水災典質以賑母錢亦脫簪珥助迨官福建署福甯府值海寇蔡牽於三沙爲巢潮乃察地勢練民勇嘉興府志

卷五十四

嘉善列傳

器

購獲賊黨悉牽踪跡出奇搗巢未幾殄滅補淡水同知治民番械鬥率勇直前宣布威信經年而平

新纂

程廷泰字西泉乾隆甲寅舉人就江西布庫大使嚴禁牙行私秤校準印烙商民稱便尋擢刑部郎中有婦被火死同官將嚴治其子廷泰諦視形迹研詢親戚供稱母子本無間因坑火延燒睡酣不知逃避子在別房聞聲奔救已遍體焦灼哀號莫及案定子得免

見魏塘人物志

程廷濟字悅舟廩貢生由方略館議敘得江西臨川縣丞升浮梁知縣訪獲鄱陽湖盜鄭萬年洪四保等置之法景德鎮兩大姓聚眾械鬥單車往諭卽時解散丁艱吉



補直隸曲周增堤防廣書院士民沾惠調署良鄉擢雲南鄧州知州引疾歸

見魏塘人物志

陳孝泳字賡言號松崖以婁籍補博士弟子員後歸原籍精篆隸金石乾隆丙寅詔修西清古鑑冢宰汪文端薦參預討論壬申中順天舉人修書成供奉懋勤殿授

國子助教累遷至陝西道監察御史晉授光祿寺正卿參曹文植撰墓誌

陳祁字如京號紅圃由謄錄議敘得邵陽縣丞升臨潼令值教匪不靖生擒首逆李貴誠歷陞甘肅布政陝甘總督賞戴花翎積勞成疾制軍那彥成為繕墓誌深致

嘉興府志

卷五十四

嘉善列傳

昱

慨焉著有從戎草南國雜詠新豐吟稿商於吟稿尤散本誼叔祖孝泳欲創義庄不果祁與堂叔暲贊成其事

楓溪小志

孫銀槎字階青乾隆丙戌進士歸班選山東濰縣引見改安徽績溪其為治以端士習為先分校所得皆名士請加學額邑人有澤留黌序之頌

見魏塘人物考

范寶瓊字六泉乾隆庚子進士部選山西山陰縣引見特改四川嘉定縣并賞給紗袍褂時教匪方熾檄督兵餉稱職歷署石砭同知嘉定府知府調赴西藏管理

錢局藏俗親死不葬教之殞殮又畏出痘有患者輒委



棄致死爲設痘局居病者醫治之仕至湖北蘄州知州  
著有古品節錄行軍須知駐藏識略新纂  
錢樾字撫棠少時器宇端重讀書過目成誦喜作擘窠大字  
乾隆壬辰翰林累遷吏部左侍郎坐失察銓吏降編  
修復累遷內閣學士兼禮部侍郎嘗主試陝西江西又  
督學四川廣西

召入

尙書房行走于役江西之歲

睿皇帝方在藩邸製詩寵行有冰心玉衡句嘉慶元年督學江

蘇先是蘇有獄連諸生懼羅織樾會鞫得雪所全多知

嘉興府志

卷五十四

嘉善列傳

吳

名士會徐州壩工火又瓜儀鹽臬盤據爲閭閻害

上命密訪二事樾指陳利害本末甚悉歲辛酉畿輔大水疏請

以工代賑又請禁南漕折色諸弊乙丑督學山左戊辰

丁艱回籍服闋患病屢蒙

溫諭問疾無虛歲甲戌力疾覲

闕以江南番錢盛行奏請嚴禁其所歷半天下熟悉民間利病

知無不言里居未嘗有干謁地方官事年七十有三卒

於家于志

陳蘭徵字香王乾隆庚辰舉人銓廣西永淳令署橫州時  
山水驟漲民多登城避溺蘭徵立發倉按丁口分給民



賴以安水退爲脩城垣三百餘丈署懷集縣邑素健訟  
蒞治甫三月刁風頓息時值邊西荒歉上官知其恤民  
瘼仍調橫州蘭徵立請出倉穀五萬石官爲平糶全活  
數千餘人後官至山東濱州知州引疾歸卒壽七十有  
九著有粵遊吟二卷樹香齋詩集六卷

于志

吳書城字擁萬嘉慶戊午舉人由中書入軍機陞戶部郎  
中補貴州遵義府知府值大旱米價騰貴飭各屬開倉  
平糶並諭殷富量力捐賑治無飢黎擢貴東道兩署臬  
篆凡遇重獄必反覆再三以勞卒年五十六生平事親  
孝自以祿不逮養爲終身恨與諸弟歡好無間有詩古

嘉興府志

卷五十四

嘉善列傳

畢

文彙各二卷筆記八卷撫苗事略一卷

于志

周以勳字次立性倜儻有幹濟才乾隆丙午舉人補山東  
嘉祥令萊陽勢豪因爭麥場曠羣奴斃其人正兇不得  
檄以勳會鞠廉得之將定案而勢豪內控

欽使來按獄以勳反覆辯論卒抵勢豪罪後以姻親迴避改江  
蘇委辦丹徒賑務周歷城鄉勸捐二十四萬餘兩活人  
數十萬計任寶山時捐廉堵築海隄悉臻鞏固陞海門  
同知旋署江甯知府以勞瘁卒於官

于志

錢清履字慶徵以壇孫乾隆甲寅舉人官蘄水縣時嚴斥  
墾溝戶糧進邑中子弟教之如家兒而發奸摘伏不稍



姑息膺卓薦陞白河口同知年踰六十告歸居家十有餘年邑中官紳重之每有疑難得其一言以決平生喜爲詩有松風老屋詩稿十六卷詞二卷于志

倪景點字檢之由安徽府經歷陞至順天府治中服官四十年所在皆實心任事而於西隆煙瘴要地尤多德政州人至今思之于志

周升桓字穉圭乾隆癸酉同兄鼎樞舉於鄉甲戌同父翼洙成進士入翰林擢侍講外補廣西蒼梧驛鹽道粵產斷腸草獠民遇忿毒人死歲常數百計升桓令犯笞杖者納草以贖罪不數年根蔓絕慘毒之獄遂除又獠民

嘉興府志

卷五十四

嘉善列傳

哭

白燭禍大吏疑土司勾結欲坐之罪升桓白其寃調土司征之戮其魁釋餘黨其他鋤奸釐弊雪枉決疑類如此旋署臬篆以事呈議謫戍在臺供應臺站外惟課通鑑摹古帖凡六年如一日歸里後長鍊山書院卒年六十有九書法宗顏詩清婉有皖遊詩存子以輝由通判籤發南河官至河南開歸陳許道旋署臬篆所至辦理河務有政績以疾乞歸廉俸所贏並助親黨喪葬于志

盛堂字素園少端重乾隆甲辰成進士選四川長甯令邑故有健訟風甫蒞任卽嚴訪訟棍每訊案隨判隨結由是四境肅清後因公呈吏議生平褐衣蔬食課子弟極



嚴家居未嘗有干謁地方官事年八十六卒

于志

周以忻字亦次嘉慶戊午舉人宰河南偃師課農桑興文

教有令名陞雲南甯州引疾歸居家孝友工書翰

于志

王煥字中照少有膽略官四川萬縣丞嘉慶初川楚教匪

滋事經略勒公調赴營理軍務煥擘畫悉中窾要子堦

字陞升四川百丈司巡檢時亦隨營數帶兵戰殺賊魁

升雲陽縣知縣加知州銜以丁母艱服闋任貴州普安

直隸同知卒官

于志

陳鵬字翼雲官貴州州判從征逆苗署定番州事會鎮戎

統援兵到州鵬獻奇計敗賊於廬山凡殺苗一千二百

嘉興府志

卷五十四

嘉善列傳

吳

餘人官兵死傷者二人鄉勇七人而已時制帥抵貞豐

設軍需總局於安順府飛檄購備軍糧接濟貞豐一路

鵬不惜重貲分路購辦又於沿途各站分佈丁役陸續

起運先後四月餘凡運米六千餘石又署普安州時有

巨猾陽黨中者本州民久於滇結黨羽至十餘萬欲謀

不軌嘉慶十五年潛回州境將取老幼赴滇尅期舉事

鵬方抵任聞之遣偵其家則已東裝秣馬待旦行矣遂

選集兵役乘夜直入擒之明日制府差官帶兵至卽以

授之後升興義縣知縣官至廣東連平州知州里吏議

薦級歸著有萬里蚤吟一卷卒年七十

于志



黃安濤字霽青父凱鈞入孝義傳嘉慶丁卯舉人已巳傳  
臚授編修丙子出典貴州試差旋充文淵閣校理與修  
一統志文苑傳尋除江西廣信府艱歸服闋補廣東高  
州府調劇改潮州初涖高州俗好訟多積獄乃檄屬州  
縣書兩造兩辭揭通衢約以期自至葺獄平以干計潮  
人好械鬪殺傷事發市人代抵名曰宰白鴨前守利易  
了率不復窮治安濤思移俗獄上輒語囚曰若但勿承  
毋他慮我養若衙中獲犯而後釋以故終其任未戮一  
代抵者屬吏成案懲失入多駁詰怨望所積浸潤達上  
官卒坐督捕疏懈被議改簡罷歸與諸文士詩酒往還

嘉興府志

卷五十四

嘉善列傳

卒

有真有益齋文集詩娛室息耕草堂詩集又著說經中  
義一百卷權濟錄綠箋詞鈔昭代詞選嶺南從政錄

沈日富  
撰墓志

鍾汪杰字元甫嘉慶丙子舉人丁丑進士分發山西授壽

陽縣歲值水旱蝗蝻後籌積儲勸墾荒作歌勸民感  
化馴復繁庶杰天資高妙學易頓悟故言性宗新建之  
說然博覽經史洽聞殫見不爲心學空言所著遺書有

二十一種詩集名小網川書屋

新纂

浦曰楷字端培號又垞母沈氏嫺禮教善吟詠有身時怡  
情蕭選生日楷讀書過目成誦漢魏六朝文若夙習然



嘉慶辛酉舉人丁丑成進士館庶常散授山東萊陽縣  
清積案嚴保甲創設書院興國寺爲祝 釐之所捐廉  
重葺並脩朱琬安雅堂會大旱禱雨輒應冒雨捕蝗卒  
有雙歧之麥道光戊子保舉卓異旋調滕縣聞治萊陽  
有威名猾吏斂迹地素產煤掘者半亡命挖過深一壓  
斃數百人嚴禁之祇存一窑供日用修上宮館肖孟子  
像其中吏治儒雅政聲方著以肝疾告歸著有自怡齋  
文集晴蘭書屋詩稿

浦氏  
行述

孫成彥原名鈞號廉甫嘉慶癸酉優貢考取八旗教習以  
知縣分發廣東署龍川有江西定南民人與龍邑人爭

嘉興府志

卷五十四

嘉善列傳

至

婚埋滅七命之案盡心究辦不兩月屍犯盡獲咨補博  
羅籌賑水灾有政聲權南雄州仁化巨盜蒙叫化等出  
肆焚掠成彥故弛捕限密伺不備掩捕之盜駭戒毋入  
境再任博羅平反盧某械殺命案旋獲正犯前議抵死  
者十餘人得雪英德匪首鄺亞清等嘯聚拒官兵宰英  
者孫福謙求退大府命成彥往匪聞旋解散嗣西匪竄  
入躬冒矢石馳往黃茅峽百花巖干段石等處追剿將  
密保擢陞遽卒

新纂

查奕照字丙唐講求經濟年少館京師侍郎琅玕宅琅赴  
浙聘掌章奏時值英吉利入貢與當道渡海觀蓮花橫



首諸洋卽欲有所設施偕海甯牧張玉田轉餉甘肅遇  
張漢潮匪警居圍城匝月策守禦阿林保督閩浙專弁  
來迎適海寇蔡牽朱潰勢方熾策以絕接濟援擄刼截  
剿躡擊諸法寇得撲滅百齡督兩江威望嚴重委令鞫  
獄有劫庫戕官案捕者以難民三人當之具白其無辜  
百督始詰責之繼器重之歎謂渺小丈夫乃能以氣節  
抗上官後隨慶保撫黔條奏運銅虧帑之苦部格於成  
議再駁再奏並請 欽使會勘遂邀 特允慶

陞督兩湖楚省例食淮鹽而永州逆流挽運寶慶鄖陽  
施南在萬山中道險難至爲稿奏請改引界議雖寢民

感之通山鹽梟拒捕戕官梟遁強獲二民人背有刺字  
者實之獄上疑有寃力勸慶率司道會鞫卒得雪修脯  
所入援例官通判進權淮安同知值河南潰決工繁帑  
絀部議按田派夫預征雜稅爲條陳不可狀請借提淮  
商引費卒如議行旣歸里與嘉興張廷濟同邑黃安濤  
相友善往來倡和尤超然塵壒云所著東望閣詩鈔及  
隨筆行世其未刻者南北史小識敬業堂集註藏於家

子世璜善畫工詩

參汪能  
肅撰傳

陳傳均字衡甫號皋蘭祖作梅宦歿雲南襁褓自滇歸貧  
不能延師稍長知苦讀母鍾呼使罷始就寢年十三補



博士弟子員娶妻十八日殂終身不復娶中嘉慶丁卯鄉試第一甲戌入翰林散館授戶部主事陞郎中道光初西陲用兵指撥餉需司農著績京察列保一等尋以失察降官遂南游楚爲制軍琦掌牋奏巡撫吳榮光器重之遂主講蓮池書院啟迪多人氣度和平雖御臧獲亦無疾言遽色以耆壽終

郁鼎鍾字彝齋道光丙戌成進士入詞林散館授江西泰和縣知縣甫下車卽懲蠹吏飭法者有宿盜案廉知退役某能召之跣緝卒獲寘諸法聽訟以誠感兩造各愜意而去邑有萃和儲英兩書院捐俸獎勵文望翕然時

嘉興府志

卷五十四

嘉善列傳

五

粵東有兵事邑當孔道供億頻仍紳民喜其廉而無擾集資相助差畢悉以廉俸償鼎鍾性冲澹苦案牘勞形遂乞休貧不能歸贛州守王藩重建陽明書院適落成聘主講席在贛五年教有程式士風丕振歸鄉後足不入城鍵戶著書遠近從學者踵至著有平川舊聞心香閣詩鈔彝齋文集平川詩徵舊聞識餘校補袁氏紀年顛編注釋王脩竹論畫詩

上海賈履上撰傳

錢寶青字萍疇內閣學士樾曾孫幼岐嶷能文章道光辛丑成進士由戶部主事荐擢至宗人府府丞仍在軍機章京行走一典湖北鄉試一充朝考閱卷咸豐七年京



城鐵錢壅滯條陳疏通八年俄嘆欲派員駐京桂良花  
沙納先與照會允准然後奏聞寶青疏摘原摺有駐京  
是否另有詭謀實不敢信等奏則是姑爲是請以貽朝  
廷憂他日准行之害君相任其咎而彼已先事聲明其  
立足不爲不穩應請宸衷獨斷應剿應撫悉歸僧格林  
沁督辦桂良等立與罷斥九年奉詢湖北軍情歷陳官  
文胡林翼和衷濟事規畫四路進兵誘堅守之賊使之  
野戰復沿江躡擊俾疲奔命楚軍成敗視林翼去留爲  
轉移毋任撫臣以奪情爲不安許離署任言中機宜悉  
嘉納之仕至戶部右侍郎都察院左副都御史

節錄  
國史館

嘉興府志

卷五十四

嘉善列傳

蓄

傳

謝字澄字石雲由廩貢議敘任甯晉縣漳沱河水溢設筏  
救民無算西陲用兵轉餉有功保陞知州後因盜案被  
劾歸工詩畫著有傳雅堂集

新纂

曹銜達字子安善記誦卅角讀時憲書三遍覆不遺一字  
年十二九經三史已畢酷好三蘇文謂老泉峭潔東坡  
橫厲欒城容與我欲合而一之初入試文無破承某邑  
宰大駭黜之繼同學示以式笑曰易耳逾年再試遂冠  
童子軍旋食餼道光戊子北闈南元癸巳進士以知縣  
用簽發福建時閩中方苦旱大吏屬僚屬撰禱龍王廟



文伸紙濡墨詞成典博懇切某中丞才之遂檄飭知邵武縣事決獄引經準律翕然有聲旋署知府卒任所新纂

盛錞字瘦金廩膳生道光登極 詔舉孝廉方正邑人舉

瘦金應後中壬午鄉榜大挑分發河南知項城縣事有

鄉民以開堰細故感堪輿家言訟案久懸錞履勘論曰

地理六經首郭璞及身不善終且無後其難憑可知况

今開堰灌農田普獲利遂呼民壯畚鍤之民理屈不復

辨有同族爭繼殤者執曰殤不立後產宜瓜分折以禮

經為殤者以其服服之眾議阻決案坐堂皇戒役勿辟

人將定讞問眾曰合理乎否則言毋隱聽訟悅服稱賢

嘉興府志

卷五十四

嘉善列傳

七

父母歸田後質樸率鄉里婚嫁勸勿從奢後進衣冠不

正不敢侍其側新纂

孫正錯字雲浦中道光壬午舉人以知縣分發四川歷署

清溪新津榮縣射洪夾江補鹽源升成都府同知貞幹

廉明所至有政聲尤善讞獄疑不決者皆平反無枉不

事刑求民以情告罷官家居足迹不入公門孫氏誌狀

孫爾榛字西山歲貢生幼不好弄祖兼金病足淹牀辱父

汝蓄咯血均侍奉寢室竭誠事湯藥甫入小學習楷法

兢兢點畫程子所謂卽此是敬之意已能領略長敦內

行家庭間片語怡然中理便消嫌隙交友偶訂言誓不



更易艱窘忍饑一二餐緘口不稱貸授徒督幼以少儀  
範長以文律敝衣蔬食躬行示儉經造就者知為西山  
門弟子也光緒紀元邑人公舉孝廉方正蹙然曰名實  
之間克稱為難卒時太息猶以無裨名教為憾云新纂  
章裕善字竹虛性孝友方介道光甲午舉人大挑以知縣  
分發江西咸豐三年署吉水縣值粵逆竄金陵江右戒  
嚴裕善練勇守禦五年賊圍郡城分擾吉水登陴固守  
自然礮擊賊賊已緣城而上十二月朔城陷裕善章服  
坐大堂濡硃筆書案上曰勿傷吾民遂遇害事聞

百優卹子雲騎尉世職新纂

嘉興府志 卷五十四 嘉善列傳

一

馬世鑑字衡齋邑庠生授徒自給庚申粵寇至城陷趨詣

明倫堂正冠巾自經於齋房新纂



